

Ogni
can
mena
la coa,
ogni
mona
dise
la soa

Discursi da ostarìa

Carta
canta,
vilan
dorme

Cuotidiano che vien fuora ogni tanto, che scolta, conta e smentisse tuto

Direzion, redazion, aministrazion, stanparia, vèndia, luogo de nàssita, avvocato, magazin: TUTO DA PESSATI

On patrimonio de l'UNESCO na lista longa: fata co giudìo?

del MESTRO

Pare che anca Suisin, dopo che sarà finii i marciapiè, là torno al domilaevintiquattro, el vegnarà messo in lista par diventare “patrimonio mondiale” de l'UNESCO. In Veneto ghe xe za Venezia, l'Arena de Verona, le Vile de Palàdio e l'Orto botanico de Padova oltre a le montagne de le Dolomiti, ca le spartièmo col Trentino. De sicuro sti posti i xe tuti na maravéja, ma ghe n'è anca, in giro pa'l mondo, che fa discutere come le Acciaierie de Völklingen in Germania che le xe on luamàro de tubi, camini, tralici, capanuni: ghe manca solo el fumo, parché le xe sarà da pi de vint'ani. Forse i le ga nominà par ringraziare che le ga smesso de invelenare meza Germania. Sicome che basta fare dimanda, st'ano che vien noantri a proponemo l'Ostaria Pessati “Sito Patrimonio Mondiale de l'UNESCO?..”. Me sà proprio che sta roba sarìa mèjo ciamarla TUTESCO...

Indovina indovinèlo...



Assè la risposta a l'osto che po' vegnarà estrato chi che ga indovinà. No se vinze gnente: (la soluzione xe sol nùmaro prima).

**Ocio birbo, paron de impresa:
chi ghe xe dedrio di'a sfoa?**

PREVISION DEL TENPO

Tuto sto istà xe stà on caldo bòja, tanto che xe sciopà el termometro de l'aqua de on radiatore so l'autostrada del Brènero. Fin a l'altro dì, anca l'autunno xe stà caldo, cussì la infuenza Ah1N1br32/ics - el rafredore d'i porzèi - la tardarà a rivare: portè passienza. Fin a lùjo no s'ha visto fumara: no la xe pi come na volta!

rio Monicelli; el vènare dopo, **13 Novembre**, a vedaremo *Il posto* de Ermano Olmi, on maestro! Assemo passare oto dì par digerire e po' toca, el **20 de Novembre**, *Pranzo di ferragosto* de Gianni Di Gregorio. El gran finale sarà el **27 de Novembre** col filme merican *Into the Wild*, de Sean Penn, na supa longa ma on spettacolo da vegnere anca co la freve. Sto vènare qua ghe sarà anca la discussion co la professoressa Viviana Ranzato che la sà vita, morte e miracoli de tuti i filme e la ne jutarà a capirghe calcosa depi so sto drama. Allora, ricordarse che **tuti i vènare de Novembre** a ghi da rimandare tuto - fora che la zena - e vegnere a la Salapolifunzionalemultisala da Pessati. Tolve nota, spece quili che ga la taresina e che i se desmèntega tuto, spesso e volentiera.

Marmo in Do majóre granito che diventa musica

de TOMASO

Tra la zente che frequenta le ostarie ghe xe senpre calche mato. L'Ostaria Pessati no xe difarente so questo, parché anca qua ghe ne xe uno (uno?). Co la scusa che, a questo, ghe piase sonare e che de laóro el fà el marmista, el se ga inventà de farse na chitara de marmo. Va ben che, co so fradelo, el jera uno del complesso “Gruppo marmoreo Bassani”, ma tirare fuora na chitara, anzi tre, da on toco de marmo la xe na bela impresa, squasi na scommessa. Le ghemmo viste in cantiere, ste chitare, e le ghemmo viste finie e parfin sentie sonare. Proprio cussì, sonare, parché no le xe solo par mostra: le sona davvero! E le pesa, questo sì, le pesa cofà na làpida, anca se le xe fate de fetine de marmo tajà cussì fine che le xe trasparente. Marmo de mille coluri, misse insieme co la fantasia e la sapienza del toso. A proposito, me despiase de no podere dire come che se ciamà el nostro artista, ma sò che de nome el fà Massimo e so fradelo de cognome el fà Bassan. El xe mato, ma anca on artista.

La rassegna d'i filme 2009

Quatro filme par quatro vènare

Ormai xe scadù el tenpo par presentare la scheda co i filme ca vorissi vedare e la comission la ga za deciso quando e cossa ca vedaremo. Tirè i oci e vardè cossa che propone la casa. Se scuminzia Vènare **6 Novembre** col filme *Speriamo che sia femmina* de Ma-

NO DESMENTEGARSE CHE...

Entro el mese de Setènbre bisogna fare la revision de càmio e diobonin rimorchi nati prima del domilazinque, le moto e i motorini, i tassì e le anbulanze oltre che le coriere. Ricordève parché senò i ve sequestra tuto, anca la television e l'aràdio.



Sta chi in parte la xe la prima chitara fata dal nostro artista, che par la privaci no ve diremo el nome gnanca soto tortura. La pesa 12 chili, e la xe fata co 4 qualità difarente de marmo: el Trani par el mànego, el Verde Guatemala el corpo, el Bianco Thassos sol davanti e po' Rosso Verona l'intarsio dedrio del mànego che, senpre par la privaci, no se vede. El disegno el xe de la Fender Telecaster. E basta.

El veneto a i veneti

Insegnare 'l dialeto a scuola

del MESTRO

O rmai la xe na facenda che xe so la boca de tuti, tirà in balo da arquantì politici nostrani. I dise che par tenere alto el nostro Veneto cogna ca se metemo a insegnarghe el dialeto a scuola a i nostri tusiti. La facenda la funzionaria cussì: so tute le case, anche quele de Suisin, ormai le mame le ghe parla in 'talian a i fiò, par parere pi ricavà e no sempre i soliti boaroti. “*Non vedi che ti inbalzi sul pavimento che sipiano tuto onto e sbrizzoloso?*”, dise la mama de turno al so putin. Cioè, bisogna parlarghe in 'talian senò dopo i lo cojona. E cussì calche furbo ga pensà ben che, dato che i tusiti no i sà pi el dialeto, bisogna insegnàrghelo a scuola. Metemo che la sia na bela idea, ma qualo dialeto xe ca ghe insegnarissino a sti fiò? “*El dialeto veneto*”, dise Zaia che 'l xe uno che la sa longa... El dialeto veneto, caro sior Ministro, el xe fato da na soma senza fine de parlate difarenti, che le càmbia da on paese a staltro, a volte anca fra na contrà e staltra del stesso paese. Alora, ghe insegnemo el veneto de Padova, quello de Venezia o quello de Pincara? A mi me piarsaria quello de la Pianta parché quello del Brójo el xe massa duro, ma go paura che a Mozzéese no i sia d'acordo. E chissà se uno de Trebaseleghe ghe piarsaria che a so fiòlo, “*che 'l parla solo 'tagliano docs*”, i ghe insegnesse a squaquarare come a Feltre oppure a Camposampiero o a Gallio? Mi la vedo dura. Anzi, la me pare proprio na stronzada, par dirla in suisan s-cèto. Vorìa dire stupidaggine, tradoto par i tusiti che no sa gnancora ben el 'talian, no i conosse el dialeto de i so noni e ghe vegnarà male a sentire che i gavarà 'nantra materia nuova a scuola. I dise che a i maestri del sud che insegna qua i ghe farà on esame aposta, cussì dopo i podarà insegnare el dialeto veneto. A me figuro el maestro Ciro Quagliarulo nativo de Secondigliano che 'l tacà la so lezion de dialeto: “*puttèi, sa 'ssiette preparà onguò, vi dago diese, un voto beïssimo che ghe farette védare al vostro pa-pà, papà, opà, pare... a la mama. Vabbuòno?*”. Assè pèrdare, scoltème mi che me piase assè parlare e scrìvare in dialeto veneto, quello de la Bassa padovana da Suisin.

Se volta pàgina e se contenta pi zente: novità o nò?

Crasse 1954: a jèra ora...

On aviso da no ciapare soto ganba, senò, adìo...

de MARIO MARRONE

G he xe on aviso che, anca se 'l xe scritto so la seconda pàgina del giornale, el ga la stessa inportanza de na riunion de i G8. La sarìa na storia longa, che la parte proprio da l'ano 1954, crasse de fero. Donca, cari valtri ca ghi la me stessa età, senti sa volì védare cossa ca ghemo pensà mi e calcun altro che se tole la briga de organizzare sta roba. **Luni 15 de Agosto del 2044**, la nostra crasse la festejarà i 90 ani, catàndosse so la *Tratoria Capanon del prete*. El programa de la giornata el sarìa questo:

- a le 10.00 - Santa Messa so l'ene (orapronobis);
- a le 11.00 - on saludo al monumento d'i caduti, pena zo da la montagnola del prete;
- a le 11.30 - intervalo par tore le mechéte, ogni uno le sóe;
- a le 12.00 - sarìa mezodi e alora toca magnare, come che dise el menu:
 1. panà o, a sièlta, paparela passà co brodeto longo de colonbo;
 2. fetine de reale de vedeleto, lesse par via de la dijestion;
 3. purè de patate, che 'l cora, on fià smolà; chi che vole ghe xe la canucia;
 4. pometo coto (uno) fredo;
 5. caffè de orzo (gnente zùcaro a chi che ga la gricemìa alta);
 6. vin gnente, e aqua a volontà (no gas).

Par le iscrizion cogna 'ndare da Pessati, calando in tola on anticipo de € 17,50 tegnendo presente, però, che dopo chi che mancarà el perdarà la capara. Justo par informazion, la roba xe stà studià dal Comitato B.D.E.M., cioè Bepe, Daniele, Elvio e Mario. Se te s'ì intressà e te s'ì nato intel 1954, vieni numeroso.

mote de libri conpaesani Suisin se mete in mostra *ma a Suisin se fa cultura? Sì!*

L a pare na idea balenga, quella de domandarse se a Suisin se fà de la cultura. E invezze la xe na roba seria. Tuto parte da on discorso che ga fato on dì Silvano B. (Barin): “*quanta zente xe che gavarà scritto on libro a Suisin?*”, el ghe fà. “*Tri, quatro*”, ga risposto el Mestro credendo de èssarghe solo elo so la lista. “*Femo on elenco*”, xe intervegnù Tomaso co la pena pronta in man. E cussì xe stà fato. Ogni nome dopo i primi du el ne ga parso na bela novità, fin ca semo riva squasi a trenta: proprio cussì, a Suisin ghe xe squasi trenta persone che ga scritto on libro. Poesie, storie varie, libri sol calcio, sol ciclismo, so na faméja, in 'talian, in dialeto: de tuto, insoma. Alora, el *Circolo Culturale*

Artico “Antonio Pasini da Solesino” el ga deciso de métare in piè na mostra par far conóssare a tuti tuto sto bende-dio. Xe ora ca tachemo a pensare al nostro paese anca tegnendo conto de la cultura, no solo d'i schei. Cussì a tuti i scrituri ca ghemo catà fuora ghe vegnarà mandà on scritto parché i se faga 'vanti a portare da Pessati na copia del libro o d'i libri che i ga scritto. Tuto vegnarà messo in mostra soto le feste de Nadale, dopo 'ver fatto on fià de publicità a tuta la facenda. Chi che vegnarà a la mostra restarà de stucco a védare quanta zente, anca zóvani, che ga ciapà carta e pena e ga fato su on libro, anca du, anca tri calchedun. No sò sa me spiego e se vu me capì... Alora, anca da le pàgine del sto jornaletto a ghe mandemo on invito a tuti i conpaesani che se ga messo a la prova scrivendo on libro, no inporta so qualo argomento: fève conóssare, portè da Pessati el vostro laóro, insieme co do righe de presentazion. I libri vegnarà missi in mostra par ben. Al resto del paese ghe disemo de no farse pregare: vegnì...